

Sgrinio Cyn Geni **Cymru**
Antenatal Screening **Wales**

Rhagarweiniad i'r profion sgrinio cyn geni

Eich dewisiadau mewn beichiogrwydd

© Hawlfraint 2011 Ymddiriedolaeth GIG Iechyd Cyhoeddus
Cymru. Cedwir pob hawl. Ni cheir ei atgynhyrchu yn gyfan
neu yn rhannol heb ganiatâd perchennog yr hawlfraint.



GIG
CYMRU
NHS
WALES

Iechyd Cyhoeddus
Cymru
Public Health
Wales

Yn ystod eich beichiogrwydd, byddwch chi'n cael cyfle i gael nifer o wahanol brofion sgrinio. Mae'r daflen yma'n cynnig gwybodaeth bwysig am sgrinio cyn geni ac am y profion. Gallwch chi ddewis cael y profion yma neu beidio. Bydd y wybodaeth yn y daflen yma'n eich helpu i ddewis. Bydd y wybodaeth yn y daflen yma'n eich helpu i benderfynu a fyddwch chi'n cael, neu'n peidio â chael, rai o'r profion neu'r profion i gyd. Byddwch chi'n cael cyfle i drafod y profion gyda'ch bydwraig a'ch meddyg.

Mae'r Gwasanaeth Iechyd Gwladol yn cadw canlyniadau pob prawf yn gyfrinachol. Mae polisiau ysbytai ynglŷn â faint o bobl fydd yn gweld canlyniadau'ch profion yn amrywio. Gall eich bydwraig esbonio'r drefn leol a fydd yn berthnasol i chi.

Mae'ch rhif GIG yn unigryw ac mae'r rhif yn caniatáu i bobl eich adnabod ar systemau cyfrifiadurol y Gwasanaeth Iechyd. Os oes copi o'ch rhif GIG gennych chi, dewch â'r rhif gyda chi pan ddewch i weld y fydwraig am y tro cyntaf neu pan ewch i'r ysbyty i ddechrau eich gofal mamolaeth.



Cymraeg Clir
Cyfieithwyd gan Ganolfan
Bedwyr Prifysgol Cymru, Bangor

www.sgriniocyngeni.org

Ebrill 2011

CP Rhifyn 10

Beth yw profion sgrinio?

Gall **profion sgrinio** ddod o hyd i rai o'r cyflyrau sy'n gallu effeithio arnoch chi neu'ch babi. Nid ydyn nhw'n dangos yn bendant eich bod chi neu'ch babi wedi'ch effeithio. Maen nhw'n mesur y siawns eich bod chi neu'ch babi wedi'ch effeithio.

Os yw canlyniad prawf sgrinio'n dangos siawns uwch fod problem neilltuol yn effeithio arnoch chi, byddwch chi'n cael cyfle i gael prawf diagnostig. Mae profion diagnostig yn rhoi canlyniadau mwy pendant, ond mae perygl y gall rhai achosi erthyliad naturiol (*miscarriage*). Dyna pam mai dim ond menywod sydd â siawns uchel o fod â phroblem sy'n cael cyfle i gael y profion yma.

Fel pob prawf meddygol, nid yw canlyniadau profion sgrinio a phroffion diagnostig yn 100% cywir.

Pa brofion sydd ar gael?

Byddwch chi'n cael cyfle i gael y profion sgrinio sy'n dilyn.

Rhwng wythnos 11 ac wythnos 13, fel arfer

Sgan uwchsain i weld:

- ym mha wythnos o'r beichiogrwydd yr ydych chi;
- a yw calon y babi'n curo;
- ac a oes mwy nag un babi.

Yn gynnar yn y beichiogrwydd, fel arfer cyn wythnos 13

Byddwch chi'n cael cyfle i gael profion gwaed i ddatgelu:

- heintiau fel HIV, hepatitis B a sifflis a allai niweidio'ch babi;
- eich grŵp gwaed a'ch grŵp Rhesws, ac i weld a oes unrhyw wrthgyrff (*antibodies*) yn eich gwaed;
- rhai anhwylderau penodol ar y gwaed (fel cryman-gell [*sickle cell*] a thalasaemia) sy'n cael eu hetifeddu;
- ac a ydych chi wedi'ch diogelu rhag cael rwbela (y frech Almaenig).

Mae'n bosib gwneud yr holl brofion yma ar yr un pryd. Gallwch chi ddewis y profion rydych chi am eu cael. Bydd eich bydwaig yn esbonio lle y gall y profion gael eu gwneud.

Rhwng wythnos 15 ac wythnos 18

Profion am syndrom Down

Gallwch chi gael prawf gwaed i fesur y siawns y gallwch chi gael babi â syndrom Down. Mae'n bosib gwneud y prawf ar ôl wythnos 15 o'r beichiogrwydd.

Rhwng wythnos 18 ac wythnos 20

Gallwch chi gael sgan uwchsain i weld a oes unrhyw broblemau yn y ffordd mae'ch babi'n datblygu.

Penderfynu ydych chi am gael y profion

Mae'n gallu bod yn anodd penderfynu pa brofion i'w cael. Mae'n well gan rai menywod beidio â chael gwybod am unrhyw heintiau sydd arnyn nhw a allai effeithio ar y babi, neu gael gwybod am unrhyw broblemau yn y ffordd mae'r babi'n datblygu. Mae menywod eraill yn awyddus i gael gwybod er mwyn diogelu'r babi rhag cael heintiau. Neu, os oes problemau difrifol ar y babi, gallan nhw ystyried a ydyn nhw am derfynu'r beichiogrwydd neu beidio.

Cymerwch eich amser i benderfynu. Gallwch chi drafod y profion gyda'ch bydwraig a'ch meddyg, a gofyn unrhyw gwestiynau sydd gennych. Mae taflenni eraill yn y pecyn yma hefyd sy'n cynnig mwy o wybodaeth am bob un o'r profion.

Ar ôl i chi ddewis pa brofion rydych chi'n awyddus i'w cael, bydd y fydwraig yn gwneud y trefniadau ar eich rhan. Bydd yn esbonio hefyd sut y byddwch chi'n cael y canlyniadau. Mae canlyniadau pob prawf sgrinio'n gyfrinachol.

Os byddwch chi'n newid eich meddwl

Rydych chi'n rhydd i newid eich meddwl ar ôl dewis.

Os byddwch chi'n penderfynu cael prawf, ac yn newid eich meddwl wedyn, cofiwch ddweud wrth eich

bydwraig. Mae'n bwysig iddi gofnodi hynny yn eich cofnodion mamolaeth.

Cofiwch:

- mai chi sy'n dewis pa brofion rydych chi'n awyddus i'w cael;
- dim ond gyda'ch caniatâd chi y bydd unrhyw brawf yn cael ei wneud;
- ac os byddwch chi'n methu prawf, fyddwch chi ddim yn cael eich atgoffa amdano.

Mwy o wybodaeth

Yn eich ffolder, dylai fod taflenni'n rhoi gwybodaeth am:

- heintiau a beichiogrwydd;
- eich grŵp gwaed a beichiogrwydd;
- sganiau uwchsain mewn beichiogrwydd;
- sgrinio am syndrom Down mewn beichiogrwydd;
- a sgrinio am gryman-gell a thalasaemia mewn beichiogrwydd.

Gallwch chi ofyn i'ch bydwraig neu feddyg yr ysbyty (eich obstetregydd) am fwy o wybodaeth am brofion sgrinio. Mae gwybodaeth hefyd ar wefan Sgrinio Cyn Geni Cymru ar: www.antenatalscreening.org

Sgrinio cyn geni – eich dewisiadau

Defnyddiwch y ffurflen yma i gofnodi pa brofion rydych chi'n awyddus i'w cael (eich dewisiadau sgrinio cyn geni).

Y prawf	Ie, Rwy'n awyddus i gael y prawf yma.	Na, Dydw i ddim yn awyddus i gael y prawf yma.	Ddim yn gwybod. Hoffwn i gael mwy o wybodaeth.
Sgan uwchsain yn gynnar mewn beichiogrwydd			
Sgrinio am HIV			
Sgrinio am hepatitis B			
Sgrinio am sifffilis			
Sgrinio am rwbela			
Sgrinio am grŵp gwaed a gwrthgyrff			
Sgrinio am gryman-gell a thalassaemia			
Sgrinio am syndrom Down			
Sgan uwchsain anomaledd y ffetws			

CARIS yw Gwasanaeth Cofrestr a Gwybodaeth Anomaleddau Cynhenid Cymru.

Mae CARIS yn casglu gwybodaeth am broblemau yn natblygiad babanod mewn beichiogrwydd. Anomaleddau cynhenid, camffurfiadau neu namau geni yw'r enwau ar y problemau yma. Maen nhw'n cynnwys problemau fel syndrom Down, namau ar y galon neu daflod holtt (cleft lip).

Mae'n bwysig iawn gwybod am y mathau yma o broblemau a'r pethau sy'n eu hachosi.

Mae CARIS yn defnyddio'r wybodaeth i fesur pa mor gyffredin yw'r problemau yma. Mae'r wybodaeth mae CARIS yn ei chasglu hefyd yn helpu i ddangos pa mor effeithiol yw'r gwasanaethau iechyd wrth ganfod y problemau yma.

Os yw'ch profion sgrinio'n awgrymu bod problemau o'r fath yn effeithio ar eich beichiogrwydd, bydd y fydwraig neu'r meddyg yn anfon gwybodaeth amdanyn nhw at CARIS.

Mae'r wybodaeth ar gofrestr CARIS yn gwbl gyfrinachol. Fyddwn ni byth yn cyhoeddi'ch enw nac yn ei roi i unrhyw un arall.

Os ydych chi'n anfodlon i'ch bydwraig neu feddyg roi gwybodaeth amdanoch chi neu'ch babi i CARIS, dywedwch wrth eich bydwraig. Bydd hi'n ysgrifennu hynny yn eich nodiadau ac yn dweud wrth CARIS eich bod chi'n anfodlon iddyn nhw ddefnyddio'ch gwybodaeth chi.